

DARI SEBULAN KE SEBULAN

Seorang ustaz di Melaka dikatakan telah berkata bahawa orang-orang yang berpegang kepada al-Quran dan al-Hadis, semata-mata tidak berpegang kepada pengertian ulama maka orang itu, kalau kematian tidak boleh diraikan. Ertinya bahawa kalau orang-orang yang berpengertian semata-mata memegang kitab Allah dan sunnah rasul-Nya sudah keluar daripada Islam – harus begitu pandangannya. Kalau begitu tentunya orang-orang yang mengerti agama hanya mengucapkan masya-Allah atau mengucapkan istighfar sahaja kepada ustaz itu. Rupanya ustaz ini tidak mengerti hukum-hukum bermasyarakat di dalam agama. Kalau di sebelah rumah kita seorang jiran, walaupun apa agamanya, kesusahan kita wajib menolong dan membantunya kerana itu kewajipan kita. Kalau ia kematian kita mesti menziarahinya dan menolong kesusahannya. Ini apa pula atas orang yang mengucap *lā ilaha illa Allāh Muḥammad rasulullāh* – mereka bersembahyang, mereka mengeluarkan zakat, mereka berpuasa dan mereka menuaikan haji (jika mampu) dengan cara-cara yang tidak ada bidaah di dalamnya, semata-mata mengikut apa yang dicontohkan oleh Rasulullah? Sudah barang tentu lebih-lebih lagi kewajipannya ke atas mereka. Janganlah perasaan dibuat dan dijadikan hukum agama. Ustaz itu tentu tidak boleh menakluk faham orang dan kerana itu dalam faham tinggalkan faham tetapi hidupkanlah kewajipan kita menegakkan ukhuwah – persaudaraan – di antara kita sesama kita! Ingat: Ini satu kewajipan yang lebih besar dan lebih diutamakan.

* * *

Sukarno, kalau dalam majlis-majlis agama berbicara tentang agama seolah-olah ia ahli agama. Begitulah ia dalam masa bercakap dalam majlis Penyambutan Nuzul Al-Quran di istana negara baharu-baharu ini mengatakan bahawa orang sekarang banyak dalam fasiq! Islam, katanya, berjuang aman dan damai – begitulah pengajaran al-Quran. Betul! Di dunia sekarang banyak orang-orang yang fasiq. Quran mengajarkan kepada supaya aman dan damai tetapi Bung Karno lupa bahawa Islam terhadap pengikutnya mesti berdisiplin – kalau ia seorang Islam maka kewajipannya mendirikan negara Islam tetapi di Amuntai dan lain-lain tempat sebelum itu apabila ditanya tentang negara Islam ia mengatakan: Tidak boleh mendirikan Islam dan ia sendiri memandang Islam sebagai penghalang. Sekali begini, sekali begitu: Dan orang yang seperti ini kalau perlu kepada Islam berkawan dengan orang Islam dan kemudian memusuhi Islam maka menurut pandangan Islam ia orang yang munafik. Orang yang munafik mengikut hukum Islam darahnya dihalalkan? Berkenaan dengan fasiq apakah Bung Karno sendiri hanya tahu perkataan fasiq tetapi bagaimana amalannya sebagai kepala negara?

* * *

Sukarno jemu dengan berperang – demikian pendapatnya dalam Penyambutan Malam Nuzul al-Quran baharu-baharu ini. Orang-orang mendengar ucapannya menggelengkan kepala kehairanan dan harus telah menyangka bahawa ((sakit otaknya belum sembuh)) kerana apakah yang dilakukannya terhadap

saudara-saudaranya di Sumatera Barat! Orang Sumatera Barat hanya menuntut supaya jemaah menteri yang dibentuknya dengan kemahuannya sendiri serta Dewan Nasional-nya yang berbau Komunis itu ditukar dengan yang lain yang berfaedah kepada rakyat. Mereka menghendaki kemakmuran rakyat bukan kemakmuran Sukarno dengan komplotannya. Balasan tuntutan mereka ini ialah serangan udara, serangan darat dan laut! Apakah ia berkata penat perang kerana menganggap orang memulakan perang pada hal ia yang melanggar bangsanya sendiri yang berharap kepada perubahan? Orang yang bertanya ini masih berpendapat bahawa Sukarno belum sembuh dari ((sakit otaknya)) -kasihan!

* * *

Suatu kebakaran besar telah berlaku di kampung Kucin dalam mana hampir berpuluhan ribu orang yang jadi korban hilang rumah tangga. Pertolongan orang ramai telah menceruh-curah tiba dan kerajaan juga menunjukkan baik budinya sehingga rancangan mengadakan perumahan semula bagi mereka yang memakan belanja hampir-hampir setengah million harus akan terlaksana di dalam masa yang selekas-lekasnya. Sekalipun yang malang berdukacita tetapi dukacita mereka dapat pula terhambur dengan bantuan orang ramai yang insaf! Sebaliknya orang-orang yang hidup di dalam rumah-rumah atap yang selalu beratapkan bintang kerana anaknya selalu berjemur dan bermandikan matahari siang – harus pula terkelindan kerana jika usaha mengadakan perumahan itu jaya harus mereka berdoa mudah-mudahan teratak buruk yang didiami mereka dimusnahkan oleh api semoga berganti baharu. Mudah-mudahan jangan ada orang yang berfikiran begini kerana mencari malang mudah mencari untung payah!

* * *

Bulan Ramadan ini dipandang ialah bulan mengutamakan ibadat dan umat Islam dipandang pemurah dalam bulan beribadat ini. Kerana ia bulan ibadat maka banyaklah timbul usaha parti-parti politik membuka langkah mereka kepada agama. Parti Rakyat yang berdasarkan sosialis dan bukan pula parti Melayu semata berikhtiar pula menarik pengikut-pengikutnya mengadakan bahagian agamanya dan memungut derma kerana masjid atau surau-surau. Di Singapura tidak ketinggalan ada ustaz-ustaz yang bersedia jadi guru untuk menjalankan rancangan-rancangan bahagian agama ((PETIR)) sehingga kita teringat kepada suatu hal tidak berapa lama dahulu di Indonesia ada Kiyai Komunis yang memberi fatwa kepada rakyat bahawasanya komunis beragama! Masya-Allah! Apakah pengaruh parti itu akan pula dijalarkan untuk menjual agama kerana umpan mereka? Apakah ada pula ustaz-ustaz kita yang kerana maslahat dirinya mahu dijadikan topeng oleh mereka untuk menarik kita?? Beginilah keadaan dunia Bung! - kata sebahagian orang kita.

* * *

Di Perak terbit pula satu perkara lagi mengenai zakat fitrah. Zakat fitrah di Perak sekarang diluluskan oleh Jabatan Agama Perak dengan diganti dengan bayaran wang, sedang menurut Undang-undang Tubuh Kerajaan yang dipegang di Perak ialah agama Islam dari mazhab al-Imam al-Shafi'i. Menurut pengajaran Imam Shafi'i pula maka zakat fitrah hendaklah diberi dengan apa yang dimakan mereka – dengan wang tidak sah. Jabatan Agama Perak menerangkan kerana keadaan darurat sultan memerintahkan supaya ditukar dengan wang sedang orang-orang di luar pula mengatakan tidak boleh dipukal borong terus – hanya di tempat-tempat yang payah – kalau terpaksa pakai wang. Perintah raja yang demikian telah melanggar hukum mazhab Imam

Shafi'i – ertiannya raja telah melanggar undang-undang yang berlawanan dengan mazhab Imam Shafi'i. Begitulah halnya

di Perak sedang seperkara lagi harus timbul:

Kalau seorang tidak berfitrah sebelum sembahyang hari raya dan kemudian ditangkap lalu dihukum kemudian sesudah hari raya maka menurut mazhab Imam Shafi'i fitrah yang tidak dikeluarkan sebelum sembahyang hari raya ialah wajib sedang yang dikeluarkan sesudah hari raya, ialah sedekah sahaja. Jadi kalau berpegang kepada Imam Shafi'i orang-orang yang tidak membayar zakat dalam masa dan dituntut mengeluarkannya sesudahnya – tidak ada lagi tuntutan wajib – hanya sunat sahaja iaitu sebagai sedekah. Beginilah pandangan dan pendapat orang-orang tentang zakat fitrah di Perak.

* * *

Untuk memungut derma Kolej Perempuan Islam di Johor Baharu, satu pertunjukan *fun fair* dan berbagai-bagi peraduan akan diadakan lagi. Setengah orang memandang bahawa langkah ini di ambil adalah kerana putus asa daripada mendapat bantuan-bantuan yang sewajarnya dari umat Islam untuk mendirikan kolej Islam itu. Ada orang memandang langkah ini tidak molek kerana usaha *fun fair* itu ada mengandungi perkara-perkara yang harus melanggar pengajaran-pengajaran Islam. Semolek-moleknnya usaha dijalankan bukannya daripada tenaga rakyat tetapi juga dari orang-orang di luar negeri. Kerana itu kebetulan Yang Dipertua Jabatan Agama Johor pergi haji dan melawat negeri-negeri Arab semoleknnya kepada beliau diwakilkan menghubung dermawan-dermawan Islam di luar negeri untuk meminta bantuan dengan jalan yang tidak bertentangan dengan ajaran Islam. Tapis – dalam usahanya – hingga hari ini tidak terdengar mengadakan *fun*

fair kerana memungut derma untuk usaha ini.

* * *

Bermacam-macam pengajaran-pengajaran karut dalam agama sudah timbul sekarang. Ilmu-ilmu tarekat telah banyak menjadi-jadi berjalan – ada ilmu tarekat hijau, ada yang mengatakan tidak payah sembahyang dan puasa, memadai dengan berniat sahaja; ada tangkal buat menahan soal Munkar Nakir dan banyak lagi karut-karut dalam agama. Tarekat yang berbagai-bagi rupa yang menghendaki supaya taat semata kepada guru atau ((khalifah)) – tidak payah ditanya-tanya lagi kerana semuanya rahsia. Ini semuanya tahayul ialah kerana ulama-ulama kita tidak mahu berjalan kepada jalan Allah yang sebenar – iaitu berpandu kepada kitab Allah dan sunnah rasul-Nya Muhammad (SAW) semata, kerana kalau kita berpandu kepadanya tidak ada lagi khurafat-khurafat yang masuk di dalam agama, semuanya bersih kerana itulah ikutan yang benar yang tidak ada helah atau dalihnya lagi.

* * *

Banyak orang heboh akan berita seorang yang masuk Islam kemudian murtad semula. Perkara ini tentunya tidak menghebohkan kita kerana orang-orang kita sendiri pun banyak yang tidak mengenal agamanya – apalagi mualaf yang diislamkan kemudian dibiarkan tidak diberi pelajaran kepada mereka. Siapakah yang mesti disalahkan dalam perkara ini? Patut kita sendiri – kita suruh mereka membaca dua kalimah syadah tinggalkan begitu sahaja hal mereka: Tidak diajar mandi, tidak diajar sembahyang dan jiwanya tidak dimasukkan tauhid yang menguatkan keimanannya. Demikianlah keadaan kita sekarang.

* * *